



Broj:01,02,03,03/11,04/8-05-2-1099/24

Sarajevo: 12.11.2024.

IZVJEŠTAJ
SA SJEDNICE KOMITETA ZA PRAVA ŽENA U EUROMEDITERANSKIM
ZEMLJAMA PARLAMENTARNE SKUPŠTINE UNIJE ZA MEDITERAN
RIM, 28. i 29. OKTOBAR 2024.

Predsjedavajući Delegacije Parlamentarne skupštine Bosne i Hercegovine (PSBiH) u Parlamentarnoj skupštini Unije za Mediteran (PSUzM) Milan Petković i zamjenica predsjedavajućeg Delegacije Rejhana Dervišević učestvovali su na zasjedanju Komiteta PSUzM za prava žena u euromediterranskim zemljama, koje je održano u Rimu, 28. i 29. oktobra 2024. Zasjedanju su prisustvovala Jelena Rajaković, sekretarka Delegacije, i Nataša Čabak, prevoditeljica.

Na zasjedanju, čiji je domaćin Senat Parlamenta Italije, razgovaralo se o temi „Pristup žena STEM obrazovnim disciplinama i profesijama (nauka, tehnologija, inženjering i matematika) u euromediterranskom regionu“.

U obraćanju učesnicima zasjedanja, zamjenica predsjedavajućeg Delegacije PSBiH u PSUzM Rejhana Dervišević upozorila je na činjenicu da se žene u procesu obrazovanja susreću s formalnim i neformalnim preprekama, čije prepoznavanje, kako je rekla, može pomoći u razvoju strategija za prevazilaženje tih izazova.

Prema njenim riječima, veliki broj zanimanja koja potpadaju pod akronim STEM su deficitarna, dobro plaćena, a uprkos tome interes djevojaka za studiranje takvih fakulteta ne raste. Dervišević je istakla da razloge za to treba tražiti u složenosti društvenih, kulturnih i institucionalnih faktora koji zajedno utiču na zastupljenost žena u STEM područjima, u predrasudi da su STEM fakulteti teži, da studiranje traje duže i da je skuplje, kao i u, kako je

rekla, iscrpljujućoj borbi za postizanje ravnoteže između poslovnog i privatnog života koja dovodi žene do negativne odluke kada je odabir STEM zanimanja u pitanju.

Prema ocjeni poslanice Dervišević, promjene obrazovnog sistema, stipendiranje i promocija su tri ključne tačke za pripremu žena za doba digitalizacije.

„Neophodno je uključivanje informacione tehnologije u nastavne planove od ranog djetinjstva. Također je neophodno uspostaviti sistem stipendiranja, odnosno pružanja finansijske podrške kroz stipendije i sigurne prilike za specijalizacije i posao nakon fakulteta, što bi podiglo motivaciju za odabir STEM zanimanja“, rekla je Dervišević te dodala da, iz iskustva univerzitetskog profesora, zna da žene u u dobi u kojoj se vrši izbor zanimanja nisu dovoljno informirane, niti svjesne značaja i pogodnosti koje diploma STEM fakulteta nosi i koje su njene konkurentne prednosti.

U svom obraćanju Dervišević se založila i za uspostavljanje sistema prekvalifikacija i cjeloživotnog učenja za žene koje će u ovom vremenu biti primorane da unaprijede svoja znanja ili promijene zanimanja.

Sumirajući svoju diskusiju, Dervišević je kazala da je za veće uključivanje žena u STEM obrazovanje, potrebna lična želja, sposobnost i trud.

„Na društvu je da omogući slobodu izbora, finansijsku podršku i kvalitetno obrazovanje“, zaključila je Dervišević.

Tokom zasjedanja parlamentarci iz zemalja članica PSUzM razmijenili su stavove, ideje i dobre prakse, te istražili modalitete većeg i značajnijeg pristupa žena STEM obrazovanju, s ciljem otklanjanja rodne diskriminacije u ovoj oblasti i jačanja uloge žena u zemljama euromediterranskog regiona.

SEKRETARKA DELEGACIJE

Jelena Rajaković

Dostaviti:

- Kolegiju Predstavničkog doma
- Kolegiju Doma naroda
- Delegaciji PSBiH u PSUzM
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za međunarodne odnose i protokol
- Kopija: Ministarstvo vanjskih poslova BiH